

Minister Otmar Oduber ta bisa

Cu construccion di Plaza Juan Pablo Duarte colonia Dominicano lo por considera Aruba como su segundo patria



Riba e combinacion di potret aki nos lector por haya un bista di e bunita ceremonia protocolario di inauguracion di e Plaza Juan Pablo Duarte den pleno centro di Oranjestad

ORANJESTAD - Diasabra atardi durante un bunita ceremonia protocolario yen di emocion y gradicimento a keda inaugura oficialmente e plaza na honor di e heroe Dominicano, Juan Pablo Duarte.

E plaza monumental aki ta situa den un sitio masha importante den centro di ciudad dilanti di hospital bieu.

E acto di cortamento di cinta pa inaugura e plaza nobo tabata na encargo di e Minister Dominicano, Ing. Luis Sifres Nuñez, minister Otmar Oduber (den representacion di Premier Mike Eman), e Lic. Juan

Daniel Balcácer kende ta presidente di e comision permanente di celebracion nacional di Republica Dominicana; y escultor Dominicano, Manuel Toribio kende a traha e busto den brons na honor di Juan Pablo Duarte.

Despues di e acto aki a ser desvela e busto di Juan Pablo Duarte dilanti di un grupo grandi di invitado y miembronan di prensa local y internacional.

Como maestro ceremonia a fungi e dos Dominicanonan y productor di radio local, sr. Juan Carlos Venturas y Oscar Fernandez; mientras cu e parti religioso

tabata na encargo di e Pastoornan Roberto y Nuris Gracia. Pastoor Roberto Gracia a bisa: "Pa nos, specialmente pa mi como Dominicano, ta yenami di felicidad di por a mira e soño aki bira un realidad: Un pida di tera den e bunita isla di Aruba unda nos por bini pa recorda nos origen y celebra nos fiestas patrióticas".


Minister Otmar Oduber den representacion di Prome Minister Mike Eman kende ainda ta den exterior a dirigi un discurso breve den cuadro di inauguracion di e plaza Dominicano Juan Pablo Duarte.

El a inicia su discurso expresando un gran "saludo di amistad", na e pueblo Dominicano; y palabranan di felicitacion pa e inauguracion di e plaza di nan heroe nacional Juan Pablo Duarte.

"Riba un dia manera awe ta bon pa reflexiona riba e pasado inspira pa e heroenan cu ta haci nos sinti nos mes orguyoso riba e dia di awe... Juan Pablo Duarte fundado di e Republica Dominicana ta un heroe....", asina minister Oduber a bisa.

Igualmente den presencia di e autoridadnan Dominicanan cu a bin especialmente pa atende e acto protocolario aki, entre otro personalidadnan minister di Informacion, Prensa y Publicidad di presidencia Dominicana, sr. Rafael Núñez y tambe e director financiero di OISOE, sr. Teodoro Tejada, Minister Oduber a probecha pa expresa su "gradicimento na e colonia Dominicana kendenan a contribui na e progreso y cu ta sigui contribui na e progreso di e isla di Aruba. Nan a integra felizmente na nos comunidad".

Na final di su discurso e mandatario a señala cu e ta convenci cu e construccion di e plaza Juan Pablo



Duarte den pleno centro di Oranjestad, e colonia Dominicano lo por considera Aruba tambe como su segundo patria, y cu nan lo duna nan miho aporte pa un futuro conhunto.

Presidente di e comision permanente di celebracion nacional di Republica Dominicana, sr. Juan Daniel Balcácer a papia riba e biografia di e heroe Dominicano, Juan Pablo Duarte, y el a bisa cu e Instituto "Duartiano" ta esun encarga di studia e bida y obra di e fundador di nan republica. El a bisa cu e luna di Juli tin un nificacion politico y existencial den e bida publico di Juan Pablo Duarte, ya cu e 16 di Juli di 1838, el a funda hunto cu su principal compañoeronan di idiolo-

gia, loke a ser yama Sociedad Patriótico "La Trinitaria", cual ta ser considera como e genesis di e estado Dominicano. E dia "e revolucionarionan inmortal a compromete su mes bou e lema santo-sacro di Dios, Patria y Libertad di crea un republica liber, soberano y independiente di tur opresion stranhero...", asina el a bisa den su discurso.

Igualmente sr. Balcácer a recorda cu riba e fecha historico di 16 di Juli di 1838, Duarte y su compañoeronan di ideologia a declara nan mes como Dominicano independiente y nan a dedica tur nan esfuersonan den e proyecto politico cu a converti e pueblo di Sto. Domingo den un estado nacion liber y soberano. □